

«Carezia vul dir survir»



Ser Christoph Zingg: «Ils carstgauns ein buca meins religius che pli baul.»

FOTO HANS HUONDER

«La Baselgia astga buca schar persula la glied. Jeu less porscher in spazi da sustegn. Religiun vul dir carezia e carezia vul dir survir – plevons che realiseschan quei han in avegnir.» Quei di ser *Christoph Zingg* che ha surpriu la Pleiv evangelica Cadi avon struschamein in onn. El seigi pertscharts da si'impurtonta funcziun, era en favur dalla giuventetgna: «Ils giuvens ein promts da separticipar ad interessants projects.» Christoph Zingg ei perschua dius che la glied ei oz buca meins religiosa. En biaras damondas seigi ella denton bia pli critica. (fmr/hh)

Pagina 5

«Igl ei pusseivel d'animar ils giuvenis per la Baselia»

Dapi prest in onn ei Christoph Zingg plevon evangelic ella Cadi. Sunter il studi dalla teologia a Berna eis el staus engaschus en differentas funcziuns dalla pastoraziun, formaziun e cussegliaziun. Per el ha la Baselia la funcziun d'accumplir la glied en in temps che fetg bia semida, era il patertgar davart la religiuin.

HANS HUONDER/FMR

«Jeu sun seviviu en bein ella Cadi. Avon che vegnir engaschus cheu enconuschevel jeu buca la regiun, mo jeu sun fascinaus dalla natura e dalla cuntrada. L'emprema ga ch'jeu sun staus el territori da skis da Mustér e hai mirau en direczion Lucmagn, ha ei teniu eri il flad a mi», di *Christoph Zingg* (60) silla damonda co el hagi empriu d'enconuscher la part su dalla Surselva. Spert mida el dalla cuntrada tier si'emprema impressiun dalla glied: «Ella ei fetg autentica, magari sceptica mo tuttina accessibla. Jeu schazegiel ch'ins salida in l'auter, da quei sun jeu buca endisau d'auters loghens nua ch'jeu hai viviu.» In dils motivs ch'il Bernes ha surpriu il post da ser *Roland Just* ch'ei ius en pensiuin, ei era il center dalla Pleiv evangelica Cadi a Mustér/Raveras: «Quei baghetg ei buca mo en in bellezza liug, el porscha era

biaras pussevliadads da sentupada, el ha fetg bia potenzial.» Ils onns 1990 ha el pastorau a Bever, ils davos onns avon che vegnir ella Cadi eis el staus meinafatschenta dalla Fundaziun dallas ovras socialas da ser Ernst Sieber: «Per mei eis ei stau clar: Sch'jeu surprindel aunc ina ga ina pleiv, lu ei quei ina ellas muntognas.»

In tip offensiv

«La Pleiv evangelica Cadi consista d'in coc entuorn Mustér. Da Tschamut entochen Breil dumbra ella rodund 440 parochians», constatescha Christoph Zingg e puntuescha: «Igl ei ina sfida da dar a tuts il sentiment d'esser en ina cuminonza. Per quei motiv organisein nus regularme in sentupadas e survetschs divins.» Per part hagi ei num tscherca la glied: «Jeu emprovel da far quei en ina moda offensiva e sun aviarts per critica ed impuls. Jeu less denton era saver dalla glied daco ch'ella ei buca cuntenza ni daco ch'ella s'exprima el senn positiv.» Entras las scolaras ed ils scolar che frequentan las lecziuns da religiuin tier Christoph Zingg vegn el er en contact cullas famiglias: «Jeu mon a casa tier ellas e vi saver tgei ch'els spetgan dall'instrucziun, tgei resalvas ch'els han e less mussar tgei ideas ch'jeu hai.» Il tempo da vera sisum la Surselva seigi auters che per exempel els marcaus: «Igl ei tut pli ponderau e pacific, schegie che tuts han lur truscha. Quei ei ina tenuta ch'jeu apprezzeschel.» Tonaton di Christoph Zingg era: «Jeu sentel era cheu meinsvart ina malsegirtad en connex cun tut quei che semida e quei ei buca pauc. Bia glied ha memia pauc temps da vegnir a frida cun quei tempo da midadas. Jeu hai era il sentiment che la cul-

In concept per la protecziun persunala

La Baselia reformada evangelica dil cantun Grischun ha elavurau in concept per la protecziun persunala. Quel ei vegnius presentau publicamein l'jamna vargada. Sco commember dil cussegl dalla baselia ei Christoph Zingg staus involviu fermamein en quei concept, gie ha schizun dau il stausch decisiv persunter: «Ins sa bein sedumandar sch'ei drova in concept per tut. El cass dalla protecziun persunala ei quei impurtont pils muments nua ch'in carstgaun sesenta offendius ni attaccaus persunalmein. Quei sa denton era esser in abus sexual. Nossa glied lavura en spitals e casas da tgira, pia en me-

naschis ed instituziuns ch'ella ei fetg datier d'autra glied. Quei sa esser ina benedicziun, mo quei sa era esser fetg difficil.» Cun quei instrumentari vul la baselia sensibilisar la glied per eventualas situaziuns che san ir en ina direczion nunvulida. Ei astgi per exempel era buca dar mobbing. «En tals cass duei la glied saver tier tgi sevolver e nua catar sustegn professiunal. El cass ideal duvrein nus buca quei instrumentari, en cass che quei ei aschia essan nus semtgai», di Christoph Zingg. Quei concept vegli era mussar nua ch'els cunfins seigien, co agir e co vegnir ord la situaziun.

tura romontscha tegni ensem cheu la glied, forsia schizun pli fetg che la Baselia.» La situaziun economica, las pussevliadads da far in emprendissadi, la piazza da lavur, co e nua viver igl avegnir – quei seigi temas predominants da biars.

Affons e giuvenils ein critics

Per Christoph Zingg ei la Giuventetgna Cadi in canal d'access alla giuventetgna: «Ils giuvenils ein engaschai, buca mo en Giuventetgna Cadi. Els ein prompts da separticipar ad interessants projects. Affons e giuvenils ch'jeu hai empriu d'enconuscher ein critics. Jeu emprovel d'involver els en temas dil mintgadi. Aschia sun jeu staus cun ina gruppa sin santeri a Cuera e hai sentiu leu, che la mort ei enzatgei che fatschenta els, era sch'els s'expriman forsia buca igl emprem mument.» Carstgauns giuvenis seigien marveglius ed aviarts mo era constructiv e cooperativs. Per quei motiv ei Christoph Zingg era optimists pertuoccont igl avegnir dallas pleivs: «Ils carstgauns ein buca meins religius che pli baul. Els restan religius, mo il patertgar semida. Oz ein ils carstgauns pli maiorens, els sesviluppesch an auter e vulan rispuestas sin lur damondas criticas. Appartener ad instituziuns classicas ei buca pli exnum quei che biars vulan.» La funcziun dils plevons seigi ei d'accumplir la glied, da survir ad ella: «La glied duei sedumandar tgei muntada che Diu ha, tgei ch'ei impurtont per nus. Sco plevon less jeu animar da sefidar da Diu, pertgei cu negin ei pli cheu, eis el aunc adina cheu. Diu lai negin persuls – quei ei in impurtont messadi.» El sez seigi staus grevamein mal-

sauns avon entgens onns, ils miedis prognosticavien aunc in temps da veta da dus onns: «Mes dus fegls eran aunc pigns. El spital hai jeu sentiu la vischinonza da Diu. Jeu hai sentiu bunamein fisicamein siu maun.» Cun quei vegli el dir: «La Baselia astga buca schar persula la glied. Jeu less porscher in spazi da sustegn. Religiuin vul dir carezia e carezia vul dir survir – plevons che realiseschan quei han in avegnir.»

Christoph Zingg (60)

ei carschius si a Rümang el cantun Turitg. Sunter igl emprendissadi mercantil ha el fatg matura avon che studiar teologia da 1986 entochen 1992 a Berna. Silsunter eis el staus engaschus dus onns sco vicari a Schüpfen. Da 1993 entochen 2001 eis el staus plevon a Bever e spiritual al Spital circucital Engiadina'ulta a Samedan. 2002 entochen 2008 ha el menau la Missiun dil marcu da Turitg e silsunter eis el staus dus onns menader dil sector «formaziun e societad» tier la Baselia reformada evangelica Aargau. Avon che sorprender 2021 la nova funcziun ella Cadi ha Christoph Zingg menau diesch onns la Fundaziun dallas ovras socialas da ser Ernst Sieber. El ei s'engaschus voluntariamein en differentas organisaziuns en Svizra e sin plaun internaziunal. Christoph Zingg ei spartius, viva en in partenadi e ha treis affons carschi.